



Disposiziun dal departament

Revisiun totala da las Directivas davart la furmaziun supplementara da persunas d'instrucziun

I. Remartgas generalas

Dapi il relasch da las Directivas davart la furmaziun supplementara da persunas d'instrucziun l'onn 2013 hai dà pliras adattaziuns da las basas legalas. Ultra da quai èn vegnidas fatgas revisiuns parzialas da la Lescha davart las scolas popularas dal chantun Grischun (Lescha davart las scolas popularas, LSP; DG 421.000) e da l'Ordinaziun tar la Lescha davart las scolas popularas (Ordinaziun davart las scolas popularas, OSP; DG 421.010) e messas en vigur per il 1. d'avust 2025. Quests svilupps pretendan adattaziuns da las directivas qua avant maun. Ultra da quai vegnan fatgas ulteriuras precisaziuns e cumplettaziuns en las directivas. Perquai ch'i vegnan fatgas pliras midadas, èsi inditgà da far ina revisiun totala.

II. Explicaziuns davart ils singuls artitgels

Scleriment dal champ d'applicaziun da l'obligaziun da furmaziun supplementara

Art. 1 al. 1 e 2 sco er art. 2 al. 1 fin 3: Ils purtaders da scola designeschan in minimum da furmaziuns supplementaras che lur persunas d'instrucziun e lur mainascolas ston absolver mintg'onni (art. 63 al. 1 LSP). In minimum obligatoric da mezs dis da curs che ston vegnir absolvids vala dentant mo per las persunas d'instrucziun, betg per ils mainascolas. Per ils mainascolas na datti betg in'obligaziun minimala legala da furmaziun supplementara. Las directivas qua avant maun sa drizzan exclusivamain a las persunas d'instrucziun, sco previs en l'art. 98 al. 1 lit. i LSP. Il renviament als mainascolas vegn perquai stritgà ord l'art. 1 al. 1 e 2 (champ d'applicaziun) sco er ord l'art. 2 al. 1 fin 3 (obligaziun da furmaziun supplementara).

Furmaziun supplementara entaifer la scola

Art. 5 al. 1 ed art. 11 al. 3: Las persunas d'instrucziun pon er ademplir lur obligaziun da furmaziun supplementara cun frequentar la furmaziun supplementara entaifer la scola (FSS). Quest gener da furmaziun supplementara na sa drizza però betg a singulas persunas d'instrucziun, mabain a tut las persunas d'instrucziun d'in purtader da

scola. Las noziuns «squadra da chasa da scola», «team da chasa da scola» u «team da scola», che vegnivan utilisadas fin ussa, han per part procurà per intschertezzas. Da nov vegni discurrì da «persunas d'instrucziun d'in purtader da scola» e da «persunas d'instrucziun d'in lieu da scola d'in purtader da scola». Cun quai vegni exprimì cleramain, ch'ina FSS sa drizza a tut las persunas d'instrucziun. Pli gronds purtaders da scola cun plirs lieus da scola pon ubain far FSS separadas per mintga lieu da scola ubain ina FSS per tut las persunas d'instrucziun da tut ils lieus da scola.

Recumandaziun areguard la purschida dad FSS

Art. 5 al. 6: L'onn 2024 ha l'Uffizi per la scola populara ed il sport (USS) incumbensà la Scola auta da pedagogia dal Grischun (SAPGR) da concepì in program tematic dad FSS. Il chantun vegn er vinavant a surpigliar tut ils custs per tut ils curs dad FSS, premess ch'i vegnian observadas las cundiziuns tenor ils art. 5, 11 e 13 da las directives qua avant maun. Cun il nov al. 6 po il USS far ina recumandaziun per curs dad FSS.

Cundiziuns per il congedi da furmaziun supplementara

Art. 8: Cun la revisiun parziala da l'Ordinaziun da scola da l'onn 2018 han ins tranter auter tegnì quint dal basegn da directives u cundiziuns minimalas per la concessiun d'in congedi da furmaziun supplementara. Cun l'art. 58 lit. b e c da l'Ordinaziun da scola èn uschia vegnidas integradas duas ulteriuras cundiziuns. Cun la revisiun totala qua avant maun vegnan questas duas cundiziuns integradas en las directives.

Scolaziun da persunas d'instrucziun da la pratica

Art. 9: En l'art. 3 da las directives figureschan ils differents genres da furmaziuns supplementaras per persunas d'instrucziun. Quels vegnan mintgamai precisads en ulteriurs artitgels da las directives. En l'art. 9 vegni d'ina vart declerà pli detagliadmain, che las persunas d'instrucziun possian ademplir lur obligaziun da furmaziun supplementara er tras la scolaziun da persunas d'instrucziun da la pratica. Da l'autra vart vegni renvià a las Directivas davart las plazzas da praticum.

Tariffas da basa per calcular las contribuziuns als custs da substituziuns

Art. 10 al. 2: Cun la refurma da finanzas 2016 era vegnì adattà l'art. 69 al. 2 da l'Ordinaziun da scola. Las contribuziuns als custs da substituziuns correspundan dapi lura a 28 % da la salarisaziun iniciala d'ina persuna d'instrucziun da la categoria da persunas d'instrucziun respectiva ed uschia a 20 % da la tariffa da basa da 138 %, che valeva fin lura. Ultra da quai na vegnan las tariffas da basa betg pli scuntradas cun la forza finanziaria da la vischnanca. Cun la revisiun totala qua avant maun ston questas directives vegnir adattadas a la OSP.

Participaziun dal chantun als custs

Art. 10 al. 3: Cun la revisiun parziala da la Lescha davart las scolas popularas vegn il temp d'instrucziun per la scolina da nov calculà – analogamain als auters stgalims da scola – en lecziuns empè dad uras. Ina cundiziun per la participaziun dal chantun als custs dal congedi da furmaziun supplementara è quella, che la persuna d'instrucziun haja instruì in tschert dumber da lecziuns per emna durant almain 10 onns. Quai vala ussa er per las persunas d'instrucziun sin stgalim da scolina, per las qualas la calculaziun vegniva fatga fin ussa en uras.

Art. 10 al. 4: Cun la revisiun parziala da l'Ordinaziun da scola dal 2018 era vegnì introducì in import maximal per la participaziun dal chantun als custs da la furmaziun supplementara obligatorica e dal congedi da furmaziun supplementara. La directiva qua avant maun sto vegnir cumplettada cun quest import maximal.

Dumondas da garanzia per ils custs

Art. 13: Fin ussa stuevan dumondas da garanzia per ils custs da furmaziuns supplementaras entaifer la scola e da congedis da furmaziun supplementara vegnir inoltradas al USS il pli tard 60 dis avant il cumenzament da la furmaziun supplementara. Quest termin vegn reducì a 30 dis. Qua tras survegnan ils purtaders da scola dapli spazi per organisar l'obligaziun legala da furmaziun supplementara da las persunas d'instrucziun.

Stritgada da la scolaziun da mainascolas

Art. 9 d'enfin ussa (*aboli*): La scolaziun da mainascolas na quinta betg sco obligaziun da furmaziun supplementara da la persunas d'instrucziun. Correspudentamain vegn la regulaziun vertenta da l'art. 9 stritgada or da las directivas. La basa legala per la participaziun dal chantun a la scolaziun da mainascolas (art. 73 al. 3 LSP) resta tala e quala.

III. Consequenzas finanzialas


La revisiun totala da las directivas n'ha naginas consequenzas finanzialas.

Sin basa da l'art. 98 lit. i LSP e sin proposta dal USS

concluda il Departament d'educaziun, cultura e protecziun da l'ambient:

1. La revisiun totala da las Directivas davart la furmaziun supplementara da persunas d'instrucziun vegn approvada.
2. La revisiun totala entra en vigur il 1. d'october 2025.

Communicaziun: a las autoritads e las direcziuns da las scolas popularas; a las instituziuns da la scolaziun speziala sco er a las scolas privatas; a la Magistraglia Grischun (LEGR), dunna Nora Kaiser, presidenta, Rheinstrasse 91, 7000 Cuira; a l'Associaziun dals cussegls da scola dal Grischun, dunna Nora Saratz Cazin, Via Planet 7, 7504 Puntraschigna; a la Federaziun da mainascolas dal Grischun (FMSGR), dunna Sonya Bardill, co-presidenta, Via Caguils 39, 7013 Domat e signur Richard Just, co-president, Cumpogna 28, 7450 Casti; a la Scola auta da pedagogia dal Grischun, Scalärastrasse 17, 7000 Cuira; a Uffizi per la furmaziun media-superiura; a l'Uffizi per la scola populara ed il sport.



Dr. Jon Domenic Parolini
Cusseglier guvernativ